

**JAWAPAN:**

Tuan Yang di-Pertua,

Saya tidak dapat menyangkal pandangan Ahli Yang Berhormat Gerik dan juga mana-mana individu berhubung rasa kebimbangan serta kurang yakin mereka terhadap keselamatan negara. Sehubungan itu, Kerajaan melalui Program Transformasi Politik (PTP) yang diumumkan oleh YAB Perdana Menteri telah melakukan penambahbaikan dari segi keselamatan tanpa mengabaikan dengan izin Tuan Yang Di-Pertua *civil liberties* bagi meningkatkan kembali tahap keyakinan rakyat.

Berbalik kepada persoalan yang diajukan oleh Ahli Yang Berhormat Gerik, semua pihak sedia maklum bahawa Akta Kesalahan Keselamatan (Langkah-langkah Khas) 2012 telah digunakan terhadap penceroboh-penceroboh di Lahad Datu melalui Ops Daulat di mana seramai 31 orang telah diambil tindakan di bawah Akta ini. Akta ini juga turut digunakan terhadap penahanan seramai 39 orang yang disyaki terlibat dengan aktiviti keganasan anjuran kumpulan militant IS di Syria dan Iraq.

**Manakala bagi Akta Pencegahan Jenayah (Pindaan dan Pemerluasan) 2014 pula, semenjak ia dikuatkuasakan pada 2 April 2014, indeks jenayah bagi tempoh enam (6) bulan sebelum dan selepas dikuatkuasakan yang melibatkan jenayah berat dan terancang didapati menurun iaitu sebanyak 5.29%.**

**Oleh yang demikian, berdasarkan fakta-fakta yang telah saya kemukakan tadi ternyata tidak boleh disangkal akan keberkesanan kedua-dua Akta ini dalam menangani jenayah berat dan keganasan yang mana akhirnya meningkatkan kembali keyakinan rakyat terhadap tahap keselamatan Negara agar terus terpelihara.**